

48382

بواقى الحلم

أحمد الجميلى

دار الكتب
الإسلامية
بمصر

2014

بواقى الحلم

أحمد الجميلى

الطبعة الأولى : 2014م

رقم الايداع : 2013-8685

الترقيم الدولي : 9-82-11-94-977-9888

الإخراج الفني: محمد غريب

mohdghrib@gmail.com

تصميم الغلاف: أحمد فرج

دار روعة للطبع والنشر والتوزيع

المدير العام: هبة الشرقاوي

هاتف: 00201140178144

darrawaa@yahoo.com



الفهرس

رقم الصفحة	القصيدة	مسلسل
7	الاهداء	-
8	1- مفتتح	1
9	2- القصيده	2
11	القسم الاول : من ريحة قلبك	-
12	أنا عارف	1
14	إنتى هنا	2
16	صلاه	3
17	كأنها جبريل	4
18	فريسكا	5
20	البيت القديم	6
22	أسألى الزهر	7
23	أنا إين قلبك	8
24	بنت من ريحة قلبك	9
25	القسم الثانى : إلى الحلم	-
26	1- ولد جنوبى	1
28	2- ألدغ ف حرف (الجين)	2
29	3- ساعات بحب حجات ميحبهاش غيرى	3
32	4- حجات بتعيش	4

تابع الفهرس

رقم الصفحة	القصيدة	مسلسل
34	إحتمال	5
36	مابين التجربه والحلم	6
3	يا فاجر	7
38	عصى موسى	8
40	أنا واحد غيرى	9
42	إلى طفل شهيد	10
43	بواقى الحلم	11
48	مآذن القصيده	12
50	الامانى	13
52	بيوت الريح	14
57	القسم الثالث: من دواعى التجربه	-
59	عزف	1
60	بوح	2
61	أزرق	3
64	مدى	4
65	إرتباك	5
67	الدائره	6

تابع الفهرس

رقم الصفحة	القصيدة	مسلسل
71	القسم الرابع :الى الحب ورومانتيكيات الحياه	-
73	نهر الحب	1
75	إحلميني	2
78	يا أيها الحب	3
79	أكتب كل القصايد ترتبك	4
80	بواقى الشوف	5
82	قلبك ذهب	6
83	حيطة الصبر	7
84	من وحى الفراق	8
87	مفتتح	9
86	صفصافه	10
90	قصيدة فيروزيه	11
95	هنا قلبي	12
98	ع القدي	13
99	قررت	14

الإهداء

إلى كل الحجات اللى بدأتها وماكملتش
وإلى كل الأحلام اللى حلمتها وطلعت فالصو
وإلى كل لإنسان علّمنى حرف وحبّنى ف الله
وإلى أبويا اللى مات ف نص الحلم وماكملش معايا
إلى أمى ست الناس اللى بشوف بيها الدنيا ، واللى بشوف بعنيها الحلم
إلى كل اللى ماقبلونيش وحبونى
وإلى كل اللى قابلونى وماحبونيش
إلى الجنوب : الحنين برغم قسوته
وإلى صاحبي الجدع اللى ماسينيش اغرق ونط ف قلبي ومات فيّا وعشت بيه
إلى البنت اللى حبيتها بجد وماتت
إلى اخواتى اللى هما احسن اخوات ف الدنيا
وإلى أمى بالتمنى ..عزه الشواربى
وإلى محمود درويش .الشاعر والانسان «روح القصيده»
وإلى كلية الهندسه ، إلى أحسن حاجه في كلية الهندسة
وإلى إسكندريه وناسها الجدعه قوى
وإلى أستاذتى :د/محمد بشير ، د/عاطف بسيونى .د / أحمد عبدالعليم، د/سيد
إمام ، د/ياسر مدني، اللى ساعدونى وشجعونى كثير جدا
وإلى صاحبي احمد حسن من الاصحاب الرجاله اللى تفتخر بيهم
وإلى صديقى م محمد شراقه و م / محمد عبدالشكور، م/ ياسر محمود من
احسن الشخصيات اللى قابلتها واتعلمت منها ف حياتى
وإلى كل أصدقائى وحبائى اللى مقولتش أسمهم هنا .. مش علشان ناسيهم ،
بس لو كملت كلام ،مش هلاقى صفحات أكتب فيها الديوان .. بهديلكم جميعاً
هذا الديوان وبقولكم إن لسه فى بواقى للحلم

أحمد الجميلى

أصلي خلف هذا النيل

كي أشفى

من الأحزان

وأذهب تاركاً عقلي

لكي

أتعلم النسيان

وأصحبني إلى لغتي

لتحملني إلى الانسان

القصيدة

القصيده : بنت بتضيف الجمال للورد

صوره : بتزيد الشغف للرد

رعشه : بتخلّي الغيوم ترقص

ضحكه : بتضيف الهزار للجد

حرف: بيلملم نزيف الروح

بوح : بيصلّي الوجع كالفرص

طفل : بيقيم الاذان ف الفجر

ناى : بيؤزع بكاه ع الخد

طير : بيسبّح بإسم الله

معنى : بيوجّه عنيه ع القصد

بحر : بيزيد العشيق تشويق

أرض : بتمد اللّى تايه أرض

I

إلى... حبات من ريحة قلبك

كأنني لستُ نفس الطفل
بنفس القفل نفس الروح
كأنّ الدنيا جوابا
بتلعب بين مراكب نوح

أنا عارف

أنا عارف إنَّك عارف .. إنَّ أنا محتاجك مِن فتره

أنا عارف إنَّك هتشوفنى ، وبسبِّح بِاسْمِكَ بِالْفِطْره

أنا واحد ساب أحزانه وراه .. واتغطَّى بحسن الظن إليك

فا (يارب) أنا جاى بهرول ليك

سلّمت إليك كل الماضى ، وأنا جنبك واثق من بكره

إنتى هنا

إنتى هنا

كل البنات غيرانه منك

كأنك ورده أو كأنك طيف

روحك ملاك ع الأرض

نازل م السما

مايل على روحك أنا..

ف قلبك ببدا التجديف

ياقلب أحمد

كل الفصول لما بشوفك شتا

كل الفصول لما تغيبى صيف

وبشهقك ف الصبح ويا الطير
وبضحكك مع طلعت الأزهار
وبسكنك فابقى امتداد للخير
وبكتبك ف تخشنى الأنوار ..

صلاه

عدى طُوفَانِ القَصَايدِ
وانجرِفْنَا
هَزَّ هذا الشَّعْرَ اصْوَاتِ
إِرْتَجَافُنَا
مِنْ ضِيقِكَ
أَمْنَى القلبِ اللى خَافِكَ
واجمعى كل اختلافنا
إنزعى كل الخناجرِ
و
أصلبى مواعيدِ عِجَافِنَا
طهرى جرحى بدموعك
و
انزفِينى
حب سارح بين ضلوعك
وانكرى كل اللى خافنا
و
اذكرينى جوه منك
لحظة الشوق إن عزفنا
واندهينى
كام صلاه للحب قمنا
كام صلاه للشوق هتفنا

عيونك مُنتهى عشقى
وعشقك منتهى الإيمان

وضحكك فى الهوى تسبيح
وصوتك فى الدعا كروان

بشُوفك فى السما نجمه
وإن غبتى منيش إنسان

كأنَّها جبريل

وَفُضِّلْتُ تَكَلَّمَنِي عَنْ رَبِّنا ساعه ، وكأنَّها « جبريل »

أنا مستحيل ، أبعد عن حاجه بالشكل ده

بتنور الأفئده بالوحى والتنزيل.....

فريسكا

برغم إنحصار الدموع في العيون

بتنزل دموعك في روح المكان

بصلّي

وبشرب أهاتك بريق

بشق الطريق ..

اللي حاجز عنكي

وبعلن حصاري

أنا جوه دارك

بلقط سنابل سمارك فريسكا

وبجني جناين جنايك حنان

البيت القديم

أنا البيت القديم جامع
ملايح قلبك الصافي
ولما بتبدأى تخافى
بصلّى ركعتينك قُزُبْ
أنا الواقف ف مسبحتك
وأنا النّايه ف موالك
غوانى الليل ورقصته
وحزمت القصايد فيه
مليت إسمك ف مملكتى
ولخبطتك
عشان تنسيه
كفايا عليا انا فاكر
ولو قلبك طغى وسافر
مانيش هقدر أعيش بعديه
أنا قلبى كما آيه
وانتى ف المدا حكايه

رسمتِ للخلود صورَه
ورسمتِ للجمال تمثال
أنا قلبى قليل الحيله
لكن مش قليل الحال
نزيه فوق الخيال وأكثر
أنا الصبح اللّى ف عيونك
بدا وبدر
أنا المفتون بأحلامك
وأنا الكافر عشان أسلم...!!
فملينى عشان اكتب
وملينى عشان أحلم

أسألى الزهر

أسألى الزهر اللّـي شَافِك
وأسألى النسمه اللي طايـره فوق كتافك
فين مكانى جوه كونك
أنا الساكن ف وجدانك
ومسجـونك
أنا التّايه ف بصّاتك
وانا المسكون ببسماتك،
هنا بشـويش بسلم لك
خُطايا ترسى فى رملك
وتحضن شوقك المكنون
أنا أول سما تَظَلُّك
وأنا أول دليل ليكى
عنيكى لحظة التوهان
بتسكننى
وانا التايه ورا عيونك
بسكنك لحظة سكونك
واعشقك لحظة جنونك
وابقى سجاده ف صلاتك
برتبك لحظة سُكاتك
واختفى لحظة ظنونك

بطمئن بنور عيونك
وأبدرك أحلام ومغنى
بسمعك ف الكون يسعنا
تبتدى الأنوار تهلك
إسألى نبضك يدلك
مين بيسكن صوت فؤادك
مين بيعشق شكل ضلك
طوق نجاتك
فاسكنينى
واحتوينى بمعجزاتك

أنا ابن قلبك

أنا جوه قلبك وطن
ببشدة مني
سأرح ف ضيک أنا
وعنيکی وخديتي
أنا ابن قلبك صحيح
لكن بدون تصريح
عاش أنا ف روحك
والنور ببسكتي

بنت من ريحة قلبك

یاااااااااااا

على فدان الصدق النازف منها براءة
وعنيها لما بتشم الونس في هَوَاك
بتفرد (نشابة) صبرها فوق حزنك ،
وتصب ريقها المليان هزار جَوَاك

البنت اللى بتجرى ف قلبك

مجنونه بيك

احضنها برمش عنيك

ماتنامش

ف نص الحلم وفوق

أنشر

تباريح احلامك شوق

اتہجی عنیہا

وابنيها.. فناصية هذا الحلم البائت فيك

حَزْمُهَا بِرُوحِكَ

النشابه هي آلة تستخدم في فرض الفطائر

وَأَدِيلُهَا مَلَاظِمَ هَمِّكَ
الْبِنْتُ الَّتِي بَتَجَرَّى فِ دَمِّكَ
جَرَارَ الْحَزَنِ غَلْبَهَا وَغَابَ
السَّكَّةَ مَا هَيْشَ مَتَشَافَهُ
وَاللَّيْلَ الْعَايِشَ فِيهَا مَلَاهَا سَرَابَ
فَاسْكُنْهَا بِيُوتَ
وَشُوطَ
ضَحْكُهُ فِ قَلْبِهَا يُمْكِنُ تَدْخُلُ تَانِي مَعَاكَ
مِنْ إِمْتَى الْحَاجَةِ الْحَلُوهِ هَتَفَضَّلُ تَسْتَنَّاكَ ...!!
الْبِنْتُ أَهَى وَاقِفَهُ هُنَاكَ وَيَتَنَدَّهِكَ
وَالْبَرْدَ السَّاكِنَ جَتَّتْهَا بِيَشْهَدَ
يُوءُوه...!!!
مَاتَرَكَّزَ ...
خَشَّ فِ بَرَوَازِ ضَحْكَتِهَا وَأَتَهَجَّى الْمَشْهَدَ
خَلِيكَ نَنْ عَنِهَا الْجُوزَ
وَفُوزَ
بَعْنِيهَا الْمَلْيَانَهُ بِحُبِّكَ
قَبْلَ مَا طَيَّفَهَا يَسِيْبُكَ خَشَّهَا، إِفْتَحْ دَرَفَةَ قَلْبِهَا
وَإَكْتَبْ تَانِي هَوَاكَ
وَإَبْدِرْ عَنَاقِيدَ الشُّوقِ جَوَاهَا طَرِيقَ
وَإِفْتَحْهَا شَارِعَ جَوَاكَ

II

إلى العلم

ولد جنوبي

أبويآ يآمآ علّمنى أكون فارس

وحفظنى آيات الجدعنه والفرض

وعلّمنى أكون وسط الجموع مجموع

ووقت أما الجميع يخلا

أكون وسط المعارك أرض

وعلّمنى أحبّ الناس

كما همّا

ولما يكرهوا اللّمّه

أكون حبل الوصال ممتد

أنا شاعر رماه الشعر فوق بحرُهُ
ومسكله القصايد سيف
«سيزيف» عازف عن الواقع
فعاند مش عشان عندهُ
عشان يخفى خيوط الخوف
فأنا شاعر عشان الشعر ده دائي
منيش شاعر عشان أبقى
ف عين كل الجميع معروف

ألدغ ف حرف الجين

إعزق لروحك فدانين أحلام
وحزَم الحزن وأرقص ، رقصه سريالى
خلّيك جَسُورُ
واتكى فوق (الوثوق)
خلّى الجسور تظهر
ويبان
حدك ما بين التجربه والحلم
يمكن تلّم
الهم ف جيوبك
وتهجّ مع أول جرس
حُبّك فرس
بيشد فيك طبع الجساره
والسيجاره معبياك نوكتين
تبت يدا حلمك
ألدغ ف حرف (الجين)

(الوثوق) : هو آلة يستخدمها الفلاح فى رفع وبناء الحدود والفواصل وتقسيم الارض الى
أحواض للتحكم فى ريها بالماء

سعات بحب حجات مـحبـهـاش غـيرـى

«سعات بحب حجات مـحبـهـاش غـيرـى»
مثلاً..

بحب سعات أقوم بدري واصلّي ركعتين إحساس
عشان أشكر على النعمة الّلي ياما كتير ما يعرفهاش
بحب البنـت ف المـجـمـل تكون أجمل ،
تكون رقه وروح تملـى السـما تفسـير
بحب البنـت لما بتبقى مجنونه وتعشقنى بدون تفكير ..
بحب اقعد لوحدى كتير ف وقت الضيق
واحـب اشـرب لوحـدى الشـاي .وأسمع ناي
واحـب اشـرب بريق النهر
واموت جـداً ف ليل إبريل
لإتـى ابن هذا الشهر
بحب الضحك لما بيبقى شئ ممنوع
وابطل ضحك لما أحس فيه إستهزاء
بحب الشئ لما بيبتدى يزهد عن الأشياء
وبمسك فياع الآخر لما بحسنى متباع
وبرسم ع الشجر حزنى عشان اخضر وحضنه يساع

بحب الدعوة مِن أُمِّي وانا مسافر ف آخر اليوم
بتفتحلى السما شبّاك ..وتشبيكنى ف سماها نجوم
بحب اصحابى واعشقهم ف وقت اللوم
ولما بيعشقوا موتى
بسّن خناجر الأحلام وبقتلنى
عشان يصحوا يلاقونى غبت جواهرهم
ومت ب غدرهم مسموم
بحب أسمع أصاله كثير ،
واموت جداً ف عم منيب
حنان ماضى ، وصوت انغام
ووقت الدنيا ماتنوّر ف شبّاكى وانا مسافر
بحب اسمع اغانى منير .وانا فرحان
واموت جداً ف صوت جِدِّي لما ييقرا القرآن
بحب الليل لما يبيتدى يسكر من الألوان
وبتعجب !! وأقول ياأرب
ياخالق كل شئ بالحب والرحمه
ياعارف كل شئ بالنص والتفصيل
ياعارف مين هيعشق مين
وعارف مين مُفارق مين
وعارف كافة الضالين
وحافظ شكلهم بالكاد
ف كون واحد بتجمعهم
بلا أقسام

حقيقى هو بس ساعات
بتفرق سنتى بين الحلم وعيوني
ومن دونى ودون كل اللي مات عايش
وعاش ميت بدون أحلام
بحب أشوف صور أبويا
قبل ما أنام
عشان يفضل مايو حشنيش
ولما الشر يقلب عادته ف الايام ، بيفتحلى منابع خير
ولما يحسنى تايه
بيسمعنى واشوف روحه بتجرى جوه صوت الطير
وأحبّ الخير بلا دافع بيدفعنى لحبّ الخير
بحب الصاحب ابن الجد عنه والسّير
يكون الفرح ف أصحابه
ووقت ما يحتجوه يحزن يكون هو الأنين معزوف
ولما الدنيا تعماهم ، يكون هو البصر والشوف
بحب الخوف مع إن مافيش مابينى وبينه أى عمار
ولما الدنيا تبقى دمار .. يكون عاقل وياكل عيش
لكنى ساعات بحب الطيش
وبسمع ذبذبات الحلم
فالراديو بلا تشويش
واحب ساعات خطوط سيرى
مع ان كتير ما يحسنهاش
عشان كده قولت
ساعات جداً بحب حجات ميعشقهاش هنا غيري
عشان يمكن ما يفهمهاش

حجات بتعيش

حجات بتعيش ف جفن العين
تكون وقت اما كله يبوش
بتصلب روحك الأحلام
ف وقت الناس مايقوا فشوش
حجات بتعيش ف جوفك عُمَر
هنا مثلا دعا أمك ف وقت الطيش
ف وقت اما الجميع يقسوا
بتعديك بطيب العيش
هنا ضحكة أبوك صافيه بتند هلك
انا ضهرك ،
إذا كل الشجر ضلَّك أنا ضلَّك
إذا كل البشر خانك .أنا خلَّك
فامتكلش ولا تنساش
حجات بتعيش على وشك متخبَّاش
غُناك وانت مع اصحابك
ولعب الكوره ف الشارع
دخول البيت ف نص الليل
وتكتكت الشتا البارح
وقوفك فجاه ف الاتوبيس
لاست كبيره من غير ليه

جیوبك لما بتأرّم
متلقاش فيها نص جنيه
وضحكة بنت حبّيتها
ترجّعلك سنين عدوا
وحزن كبير مافيش قده
ف وقت أمّا الجميع ينسى
وتفكر إنت مابتنساش
حجات هتعيش على وشك
متتخباش

إحتمال

إحتمال القلب يصفى
وإحتمال الروح تبوح
إحتمال الفرقه تجمع
وإحتمال البوح يروح
إحتمال الجمع ينقص
وإحتمال النقص يكمل
وإحتمال الصدفة بحته
تبقى جايه عشان تشوف
إحتمال الخوف يشوفك
وانت مكتنف ف جوفك
تبقى تايه جوه حلمك
والظروف تعلن خسوفك
تبتدى تعلن ذهابك
تبتدى أول هروبك
تتسكن حولين ضياعك
يرجمك حلمك ويشهد
إحتمال الصبر ينفد
وإحتمال القلب يجمد
تبقى جواك الحقيقه
والسما شيفاك بتشهد

لسه جواك أَلَف آيه
تبقى تايه جوه منك
وانت شداك الحكايه
الظروف تاخذك سبايا
والهوى ساكن ف كفك
إحتمال الليل يخونك
وإحتمال مايجيش ف صفك
إبقى شيل نفسك ف خُفك
وارتجل قلبك هدايا
وانصهر جواك وروح
إحتمال القلب يصفى
وإحتمال الروح تبوح

ما بين التجربة والحلم

هنا ضحكت لك الأحلام
بتفتح لك عينيها بيوت
وتدخل قلبك المكبوت
وتفرش لك طريق الحلم روح مطلية بالازهار
هنا بنت ، وقلم ، و نهار
محبه بتدّى للأعمار ، كمان أعمار
يميل جواك شراع الحلم ،
تقوم وتوازن الدّفه
ف لحظه الناس بتتحقّى
لكين ربك هيبقى لك
هناك مركب هترسى لك ، فعيش فيها ، وعيش جواك
ولما الموج هيعلى عليك... ماتتخبّاش
مافيش غيرك هيبقى معاك
فكون حلمك ماتكسر هوش
ووقت أمّا الجميع يخلا .. ف سييه معاك ماتتخلّاش

يافجر

يافجر أذن بين عيون السيده / مصر
التي / أم البلاد
أم الولاد / التعبانين / الشقيانين / الأكلين قهر وجع
النازفين بوح للوطن
يافجر أذن للصلاه / حريه تنزل فوق جبين كل الولاد الأوليا
يافجر أطلع من ظلام الأغنيا
وابعت طيورك فى المدا
سكينه تسرح ف العدا / تقطع حشا كل اللي خان

عصى موسى

الحكاية لولبيه
فين عصى موسى النبيه
تفلق الليل اللي شارد
واللي شارد ف الكوفيه
ياقمر ساكن ف جوفى
ياهو ساكن ضفافك
هبقى واقف ف العواصف ل إنتصافك
فاسكنينى
هتلاقينى جوه منك
بسمعك واقعد أُنْكَ
باحضن الليل بين كِتَافك
واكتبك موال صعيدى
ناى
بينزف من وريدى
شارد الروح ل ابتسامه
شكلنا عشاق ل ياما
من هنا ل يوم القيامة
البياض عشش ف وشك
بس مين يعرف يُخْشِك
أو ل مين تصرّيح زيّاره

يدخلك ويعيش ويسكن
أو يطوف من غير غباره
إنَّ هذا القلب حاره
وانتى ناصيه وبيت ومعد
إنَّ هذا القلب يشهد
ع الظروف
كام سنه عايش ف خوفك
كام سنم عايش ف كهفك
بارتبك لحظة غيابك
واتكى واقعد أشفق
وارسمك أحلام غنيه
فين عصى موسى النبيه
تفلق الليل اللي شارد
واللى شارد
فالكوفيه

أنا واحد غيري

أنا واحد غيري مايشبهنيش
ماعرفش أنا فين رايع ولين
على قد وحاشة البنى آدمين
على قد مافيه فى الدنيا حنان
أنا واحد غيري ماهوش فرحان
بيشد ف ضلمة قلب الليل
وبمد خطاه

أنا أصلا ساكن من جواه
ولقيت الناس مليانه نفاق
وأنا فاكّر إنّ الطيبه ميثاق
أنا واحد غيري مايشبهنيش
ماعرفش أنا عايز إيه وإزاي
وحياتى لمن ولإمتى هعيش
ماعرفش ساعات طبع القسوه
بيخلّى الناس مابتعرفنيش
أنا واحد تالت بره الشيش
أنا واقف كومبارس المشهد
وبشاهد كل الناس جوه

أنا هاخذ نفسى وبالقوه
وهخش مدينة حب الناس
أنا واحد عايش بالاحساس
بحتاج للفرح ساعات جداً
بس الاحزان مابتفهمنيش

•

إلى طفل شهيد

شكل عينه المدبوحين
رسمته فوق الحيطان
صرخته تحت القضيبي
ضحكته وشكله العجيب
نبض روحه ،
لسه عايش لم يغيب
لم يموت
لسه عايش جوه أركان البيوت
جوه دواليب الرفاقه
جوه قمصان المدارس
جوه أعناق اللياقه
جوه ازرار العيون
لم يخون ...

بواقبي الحلم

ينادينى التاريخ أقراه
ألقى صفحة الشهدا
صور مرسومه ع الميه
والاقى ثوره جوه البحر
سمك بينادى سلميه
وألقى مظاهره ف "القائد"
بعرض "اسكندر الاكبر"
طوفان أخضر
على كتاف العيال صرخه
ينادوا كرامه حُرّيه
و "عابد" زهرة الاطفال
لا بيهاب الرصاص والموت
ولا بيرجع
أبوه مجدع
رباية عمنا « عادل »
لا بيماطل
ولا بيخدع
ومين خبى الشراع ف البحر
وساب الحبل ع الغارب
ودور ضهره للمينا
وقام هارب

ومين خبّا التاريخ فـ الرف
وشك وخاف
ومين فـ بلدنا
عاش سوّاح
ومين فـ الغربه
لفّ وطاف

ومين فـ النور مشى بالعكس
ومين فـ الضلمه سمّى وشاف

الزهر المفتّح مات
والقلم المداوي ملّ
والقاضي اللعين إختل

ماشيفيش إنّّه فى أموات
والشتل اللّى زارّعُه اتشل
والطرح اللّى قايم بات

أنا اسف يا حلم
انا زيّهم بعتر
همّا اللّى مش راضيين
يكملوك تنتصر

الصبح بقى مخدوع، أسود، عجوز، كسلان
والليل كئيب، معوج، مسجون، ضريح، حيران
يانهاية الاحزان
شدّى البيبان شدّى

على حلمك اللي إنكسر
وشموخك الفضّى

مِنْ لَيْلِكَ اللَّيْ اِشْتَكِي
وَمِنْ صُبْحِكَ اللَّيْ بَكِي
ده النخل لا ان واتكى
خَلَّى الزهور تبكى
ليالى ليا ليكى ليا ليه
ليالى الحلم مطفيه

وانا مكمل
ليالى الحلم مصريه
بتتجمل

وَمِنْ عَجْزِ التَّارِيخِ
بِسَرْدِ حِكَايَاتِي
وَمِنْ خَوْفِ الطَّرِيقِ
مُصْلُوبٍ وَمُتَأَمِّلٍ

ومش ماشى
ولا معزول
أنا المقتول
وأنا المدبوح

هنا زعقة طيور الحلم
هنا شهقة شهيد الروح-
هنا فطر بيان مخدوع
وبتغشى لى كام مدفع
يصدو عن حشايا الجوع

مراكب نصّها فاضى
جبينى كلّ مـ الترحال
نفس مليان عجل للحلم
تدّب الخطوه فوق الارض
تقوم جنبها الزلزال

بيسكر دمعك الناشف
يكسّر ف الجبال صمته ويتحاشى
يدور المدفع المهزوم ويتلاشى
بنفس أُمى وضحكة ست ف الخمسين
توزع ع العساكر عيش
بيحضن دمعها الاسفلت
تفوح أجمل روايح دم من الأحرار
تجاعيد الصراخ والخوف
وبسمة شيخ بيتظاهر عشان بلده
تروح روحه
ف طلقه طشاش

ولسّنه السّت بتوّزع
جمايل حب للعسكر
تقول أوعى تصوّب بيها فإخواتك
يموتوا بلاش
ولسّنه الظالم المزعوم بيقتل فيا بالاحكام
وماتحلاش
ولسه خطوتى بتهتز
على المركب
بشد القلع

والأقى الجزع متمكن ف قلب السّت
والأقى البنّت محتاره
مايين ضحكّه ف شكل الحلم
وبين سحله على الرّصفان
مايين مصلوب على القضبان
وبين إبره تصحّينى ف نص الليل
بقوم مفزوع من الأشكال
قليل المال
لاغره المال ولا هزّه
ولا أتغيرش
وبرجع وأفتكر تانى
بانّ الحلم ليه باقى
وماتكملش

مآذن القصيده

بصلّى بحروف القصيدة الجديده
وبطلع منابر جميع القوافى
واسبّح بحمد الجمال
اللى خافى
ف عيون المآذن
ف قلب الطيور
اللى رافضه المبيت
جوه قلب المدافع
بدافع
بكل الجمال اللى ساكن
عيون الصبايا
وبزرع عيون المناجل
خناجر
ف قلب الضغينه
بشاهد
سما كل بسمه
بتسكن شطوط القلوب
وتراضيهها
بحبال المقايده

بترسم شعاع
السلام الموازي
ف طريق المحايدة
وتحضن طريق الغريب
اللى عابر
ف سكة مافيش
مافيش حدّ ناقص
مافيش حدّ كامل
مافيش روح سجينه
بفرض السكينه
بتكمل
دواير
خطاوى اللى عابر
دروب المدينه
وانا لسه وحدى
شريعتي قصيدتي
بصلى
ف رحاب القصيده
الجديده
وبرسى ف مراكب
عيون القوافى

الأمانى

عُمرُ ساكن بين ضلوعك
إرتجل فيه الامانى
إبتسم لحظة
خضوعك
واحضن الليل بالإغانى
كل شئ
فى الدنيا ممكن
سور
هناك صعب ومخيف
الشتا بيمر صيف
و
الحقيقه بتبقى
زيف ،
والدنى
بيعمل شريف ،
والمخيف
فى
القصه دايماً

إنّ مهما بتدى عمرک
طیف محبه لـ (اللى مايقدروش)
عُمُر .
ماهيقدروك
- طنش اللى بيخونوك
وارتجل
قلبك جواهر
طلع الحب اللى ظاهر
واحضن الليل
بالأغانى
عمر ساكن بين ضلوعك
إرتجل فيه الأمانى

بيوت الريح

أنا سكينك / وأنا دينك / وأنا جنبك بطل محمى : موجة قبلته ف دارك /
بيستقبل ف زوارك
وساند جبهته ف ضهرك
أنا مهربك /
فراشة قلبك التحنان بترسمنى /وصوتك ليل بيسمعنى
إذا خطيت /
بيوقفنى... إذا مديت
بيسهرنى
إذا نامت عنكى قبل ماتشفنى
بيلبسنى نغم صافى
ويسهرلك
جبال الدنيا ليل جامع على نهرك /
وأنا مكوى بنار قهرك / فلا تمشى

أنا لو كانت الدنيا ف عينك هجر / أنا قاعد وعمري ماغيب
عيون الناس ديب ف ديب
فبركينى !!
وقرينى ..
آيات الحب في دربك

أنا الساعي إلى وديك / فوديني
ووديني إلى آخر حدود العشق
جواكي .

سمايا ترسي ف سماكي
فشوقنا يزيد
فنتقابل بدون مواعيد
سما كل الحجات تصفى
و

تشرب زرعتك شهدى
أنا وحدك مع وحدى
فضمينى مابين روحك
أرتل صوتك النابض / فيسكنى
أشوفك ليل بيصحبني
إلى صبحك
إلى نورك
يمدنى على جسورك
فتلقيني
بطل مغوار
أشوف الدمع طيف دوار على عينك

فنام لك جوه كفينك
ومدد نفسى جواكى
أجفف حزنك الباكى
واغيب فيكى
سنين وشهور
واثور يمكن أهد السور
واجور فوق كل من هذك
ياساقيه الشمس من ضلك
وسقيانى
ف بيوت الريح
أنا الجانى
على نفسى :
أنا اللى الليل مانومنيش
طشاش عايش ف شكل مافيش
وروح بتصاحب الدراويش
وخيش لابس حيطان الدار
أنا الزوار
وانا الزاير
بصبر حلمك الفاير
وبعدل وشك المكفى على وشى
وبلبس وشك الأسمنت
ببارز قلبك المكشوف
ف عز الخوف

بشوفك نرد
ليل صاخب
أنا صمتك سجين دايب
ف ليل غايب عن التكوين
بروح جواكى لما بخاف
واخاف جواكى أبقى حزين
حزينه خطوتى تايه بلا روحك
عنيا بتبكي وتبوحك
شجر صبار يبطرح تحت عُقب الخوف
وانا لابس شيلانك صوف
وجوف
عايش على الحرمان
كمال بيوافق النقصان
وطير عاجز عن الطيران
وناس عاجزه عن الانسان
وصوت رنان
بيجرى تحت شريانك
أنا المصلوب بأحزانك
بجفّف نفسى من فرجك
غريب ماشى ف بيوت الريح
بصاحب
زمرّة التسبيح
عشيق ساكن شهور (نيسان)
بلملم نفسى من حزنك
واصفّىكى من الأحزان

III

من دواعى التجربه

عندما يعجز الممكن عن تصديق الحلم ..ويظل
حزنك بواقع أنت ترفضه، وحب لم تستطيع الوصل
إليه ، وسماء باهته وأرض مكتظه ، وجنان مقفله
، وشاعر قد طاف بالحزن سبع أشواط ..نحو موته
ولم يزل حيا علي قيد الموت / ميتاً علي قيد الحياة؛
...من دواعي التجربه

عزف

مين اللّٰي يعرف يرتجل حزنك
كل الضلوع فتحت عروقها نايات
بتنزل الوجع اللّٰي بات
وبتتني .
يا أيها الشاعر . رجّني
إنّ القصائد لم تكف عن النزيف
أين الدواء لأنّ حزنك علّني

بوح

يادمعة الأفراح ف قلب الحزن
وقفى المشهد وابدأى التنزيل
لحظه

ثبات الحزن جوايا
إن الكلام قد شذ فى الترتيل
هزى جدارك (يا أيها الدمعة)
إننى أنا وحيك / عينائى مالحتان من بحرك
إظهرى

وإتنطى فوق الجريد / هذا الولد عربيد
إتمكنى جواه، وأصلبى دربه
صليّه

لعله يهتدى
واتعشقى ف قلبه
قلبه :

كما النرجس
إنسان بمعنى كلمة الانسان
إنظرى

عيناه ، سوداوان
تمتلكان هذا الوجد والاشواق

أزرق

أزرق
بلون البحر لما يخاصم العشاق
ويملى الموج على ضفافه
سهر وعويل

أزرق
بلون النيل
لما يصاحب الأحلام
بتضحك غربتك م التيه
فتبعت مركبك مرسل

أزرق
بلون الحق لما يصاحب المحتال
يموت تزييف
يشوف الحق يبقى كفيف
بدون أسباب
بتبقى غياب
وحتى الضحكه من الأقرب
سحابة صيف

أزرق
بلون الشوف لما الخوف
بيملا الجوف
تلاقى الناس بتتغير
وتنكر كافة المعروف

أزرق
بلون الدهشه لما تصاحب المهفوف
بيخفى دهشته جواه
ولما تشوفه يعمل نفسه مش شايفك
ويبقى اللعب ع المكشوف
أزرق
بلون الناس لما تخون
بتمشى بحلمك المسجون
ف عز البرد
رسايل طرد
من كل الجهات.. أئات
بتفتح لك
منافذ للهروب
جواك
مافيش غيرك هيبقى معاك

ما فيش غيرك هيترجاك
فشد خُطاك
وأطلع بره هذا الهدّ
ومد يداك إلى كل القلوب تتمد
روحك فيك
تلاقى الفرّح مستنّيك
ويفرشلك بيوت الود
جوه الريح
تلاقى الضحك يبقى فصيح
وتملّاك السما تسبيح
وتملّاك الجنّاين ورد

مدى

مدى سارح فـ جوف غربه
وناس متغربه جَوَّاك
بتغرق روحك الـ وحشاك
ولا حدش بيسمع حدّ
هزارك كله كان جدّك
وحّدك عمره ما اتخطّاك
جبل طارح فـ حلق مـداك
فلا تسرح ولا تولى
ويمم جبهتك ظلّي
وأشربنى دموع سارحه ..
تبلىل روحك الطارحه
دعى ساكن فـ قلب سَمّاك

ملك وكتابه

الوش فيه حبة طيابه

والقلب

فيه

حتّه

مليانه بالتشويش ...

خُذْكَ ملاك أتوضى واسرح معاه

واترك جدالك فى الهوى والطيش

خليك جدع وسط الهموم واقف

لاتغيب ، لاترجع ، لاتتقّع ، لا تبيش

جددّ حياتك واخترع أجددّ طريقه

فد الخصام والبعد والتهميش

صوب على حلمك هدف واحتد

يوم واحد

وافتح ببيان الشيش

واجه مصيبتك ، واحتدم وامتنص

كل الدمار م النحيتين بشويش

كل الخناجر فى ضهرك ، يَبْرُكُ
كيد العوازل ، ضربته فى الهيش

إكذب عليا وإضرب تحت الحزام
وأعمل ملاك وهصدّقك

بس ف غيايى
شِيلْنِي، ماتبعنيش
نفسى السما ، تسمعنى وانا بدعى
إِنَّ اللّٰهَ بِقِيَّتِهِ
يبقى ، ماينكرنيش

كل الطيور لها قدره ع الطيران
كل الجكايه .بين مسافه وریش

كل النفوس لها قدره النسيان
فى نفس تصفى ، ونفس مابتصفيش
هتضديق قوى الدنيا عليك
بس إفتكر
[ضاقت فلما استحكمت حلقاتها]
جاك الفرج
من بعد موت / فتعيش

إرتباك

خُطًا فوق ضلمة الواقع
ونور جوه العيون بيخف
بتزهق
لحظة الترتيب
ولحظة
ما اللقى بيغيب
بتسكن روحك الولهى
سؤال ,
لازق فسقف الحلق
لافف لف
مافيش إجابات
بتحضن حيرة الواقع
ولا واقع
بيوقف عزف
بترقص فوق جناين قلبك المشنوق
وتطلع فوق
تطلع فوووووووووق
وتنزل / حدف

الدايره

سنين بتلف دؤاره
ومين بيكون على حاله
ومايتغيرش
حيطان الغلب قلاابه
مايتعبرش
ولا ترش
وأنا واقف مابتهرش
فوش الريح
بصدّ الريح
وبمشيله الطريق مراجيح

طاحونه بتهرس الإحلام
وأنا واقف فوش المدفع الهدّام
وصدرى فى الخلا مفتوح
بيستقبل رزاز النار
لا أنا خايف. ولا كاشش
ولا بنهار

عجل دؤار
ودنيا غروره دؤاره
وناس بتحب يا خساره
ماتتحبش
مراكب من ورق بتدور ف قلب النيل
ماتتبلش
وناس بتخش جوه القلب

وناس حاله
لاماتخشش
وناس بتقول كلام أوزان
وساعة الجد
ماتسدش
وأنا واقف فى وش المدفع
الهدام
مابتهدش

أنا والغيره مابنصفاش
وكام واحد كتم أسرار
فى صدره ولا قلهاش
وكام واحد عزم والنيه هيصلى
وراح للقبله ما عرفهاش

IIII

إلى الحب ورومنتيكيات الحياه

أنا ورده رماها الشوق
وعذاها بميت قارب
أنا
ماشى
وهرد الباب
وسايب قلبى متوارب

نهر الحب

أنا خطك فكل كتاب
وأنا مشيك على الأسفلت
عنيكي وإنتى ع الكورنيش
ونظراتك لكل اتنين بيتمشوا
وربكة قلبك المسكين
كطير بينوح على عشو

أنا حبك وأنا عشقك
وأنا الساعه اللي لابساها
وأنا العقد اللي بين كتفك
وأنا الشارع بتمشى عليه
فيتباهى بخطى مشيك
وأنا وانتى
ومين فى الدنيا يمنعنا
تسافر عيني ف عنيكى
يغازل شعرك المرسى
تطير أحزاني ف الملكوت
بعلو الصوت أناجيكى
واغنيكى
وانتى غناى

ياساكنه جوه صوت شعري
وصوت ضحكي
وصوت الناي
ضلوعى كلها لانت
وانا من بره كيف الصخر
كما الجدران
تصد الصوت وتدرى
وتمشيني بلا شطآن

إحلمینى

إحلمینى طار وطبله
یفرحوکى ویملوا شیشک

واحلمینى بیت ومعبد
تسکنینى ف وقت طیشک

واحلمینى واد بیرقص
لسه عمره مانتهاش

واحلمینى صُبح ناير
لسه ليله مابتداش

احلمینى صوت و ذکرى
واحلمینى کتاب وفکره

واحلمینى وانشدى وشدى العمار
کبرى الله اکبر ، وأحلمى بالانتصار

واحلمینى ضرب نار
یبقى صاحی يوم زفافک

إحلمينى شوق يبيعت
كام رساله لانسجامك

إحلمينى ف أى حته
ف الشوارع المحطه .
ف الجوامع ف المدارس .
ف الكنايس .

وإحلمينى ف الحصيد وقت الدريس
وإبعدى منى الخسيس

إحلمينى واد رزين
قلبه عاقل
جوه هذا العقل طيش

إحلمينى بشعرى الاكرت
مش راح اعمل لك كنيش

إحلمينى فجر عُمرك
ورد فتّح أمنيّاتك

وإحلمينى برع فارس من غُزاتك
وإحلمينى بين صلاتك
وإشقهى وقت الربيع

إحلمينى الحلم نورك
وإقتلى فدان غرورك

وإركبى فوق المراكب/ واتنططى
غيرى الدفه بهواكى/ .واقلبى مجرى الشراع
رجعى الحلم اللى ضاع
واحلمينى حلم ساكن بين عروقك

واحلمينى .. “ _ ”

يا أيها الحب

يا أيها الحب اللي مالى دفتى
أنصب شراعك يمتى
ملينى أسرار الهوى
واكتب تواريخ النجاه
الصبح ساكن ف الجباه
والليل غواه طول السهر
يا أيها النور اللي ساكن ف القمر
أشرح
واسرح فى المدى
كل القصايد مغمده جوه الحروف
وانا شغلتي
داير بطوف
والشعر ده سيدنا الولي
يا ايها الحب العلى
أنثر سيوفك وانجلى
وادخل قلوبنا المقفله

أكتبك .. كل القصائد ترتبك

كل الدروب محتاجه سكّه للرحيل

وأنا جوه روحك بارتحل

مشبوك ف قلبك

فافهمي

أكتبك

.. كل القصائد ترتبك

وأرتجل صوتك غنا

كل القصائد مؤمنه

بس إنتى شاورى

وسلمى

بواقى الشوف

هنا حيث إتجاه القلب
طاير للسما مركب يشدّ الروح
هنا حيث إتجاه الصدق
ناى بيبوح
إلى نقطة وصول كبرى
تهزّ النفس
تهدّ الزيف
تمدّ إلى القلوب رحمه
فنتدفى ف بواقى الشوف
إلى حيث الغنا سارح ف عز البرد
هنا كُنْتُكَ .بوكيه الورد
هنا كُنْتُكَ قصيده ونرد
ف الأشعار
أنا ليلك بيتهجى السهر فيكى
ويشرب قهوتك أسرار
أنا مالك وانا ناسك
ولما بتشرىبى خمرك .بيكون كاسك
واكون خيلك

بشد ربابة الشاعر واغنيك
أنا نيلك . ولد أسمر
بأنّ لغربتي واسكر
مع الاحلام
عيونك لسه شارع سد
وقلبك حاره مش بتنام

قلبك دهب

قلبك دهب، قلبي أنا فضه
أيام بتنقضي
وأنا مش لقيني هناك
طلّي من الشباك
لمّي الحجات وامشي
رمشك ،
لمس رمشي
وانا رمشي مش نسّاك

حيطه الصبر

حُبِّكَ غَامٌ وَلَمْ هَمُّوْهُ جَوَايَا
وَجِبَّ وَجَارٌ وَجَزَّئِنِي / وَسَرَّحْنِي، وَصَلَانِي
وَجَمَّعَ كَلِمَةَ الشَّاعِرِ وَوَضَانِي
وَتَوَهَّنِي وَتَوَهَّ قَبْلَتِكَ عَنِّي
مَنْ يَشِ عَارِفٌ أَحْجَكَ فِينِ...؟
وَفِينِ أَبْدَأُ. وَفِينِ تَلْقَانِي شَرَاعَتِكَ
فَتَوَهَّنِي. وَتَوَهَّ حَلْمٌ أَنَا سَقْتَهُ عَلَى أَدِيكَ
بِرَغْمِ بَرُودَةِ اللَّيْلِ الدَّكِينِ فَيْكِي
سَنَدَتِ الصَّبْرُ عَ الْحَيْطَةِ
وَسَقَتِ النَّارُ وَوَدَعَتْكَ ،

من وحى الفراق

ماكنش صُدفه اللقا
آخر معاد ..مِتَعَادُ
حُبِّكَ لهذا الإبتعاد ..مُعتَاد
رايحه ف سِجِّكَ بتغرِّقك
وتبعِدُك
وبيتملى قلبك رَمَاد

هذا الغلام
ماغرَّهوش الصور لِّما خسر
لِّما حجاتها وجرى
جوه المراكب يراقب

ف إديها واد / من صلب هذا الحب
قلبه مدبّ
داب لِّما صحيت جواه

لِّما رجع
ماغارش م الدبله ولاقلبه اتفجع
ولاهرّته
ماهى مش وجيعة دبلتين
وبدل ما كانت معاه
اتحولت خصمه
ده الرّك على قلبها المليان
سلاسل بإسمه

يا أيها الحب اللّـي راح لى
وشفته منك
يا أيها الأغنيه شاهده على السماع
كل القصايد.. أتحرزمت. و راح تغنى وتبتسملك
وترسمك عيل شجاع

صفصافه

بحبك شجرة الصفصاف ف يوم طررك
وللم جرك المفتول بأحزاني
وأجبك كوم هدايا عطور ف يوم فرجك
وأجند نفسي جندى نظام لأوطاني
ياشاهده الحزن، والأفراح أنا شهدك
يانسمة شمسنا الصافيه ف بُستّانك
وألوانك .يامحلا لبس فستانك

ياسر الضحكه وقت الحزن
يافرحة بيتنا فى اللّمه
ولما الموجه بتبلل أراضيكى
بتلمع عينك الحلوه
وأنا بقولك (200) غنوه
لكين والله مايكفيكى

بحبك موجه ع المينا
وأحبك رمله ف الصحرا
وخف جملنا جنبينا
نجى نعطش .يحمّلنا ويزقينا
بحب كلامى فى عنيكى
يصبرنى ويشجيكى
بغنىك ف ترحالك
ياساحره القلب بجمالك
يامحلا لبس خلخالك
أنا رايع لسى خالك
جمال أحمد أنا طيب
وأصلى فى الهوى عالى
سلامة قلبك الطيب
ياريح شالالنا فى الوادي

يسافر قلبى وأنا قاعد
وصدك لما بيعاند مجننى
كلام الناس على فراقنا ماهامنى
وقمحك هو لونك
وشتلك جوه شكلك
وف مشاكلك كنت خايف
أصل شكلك لما تنوى ع النهايه
جوه أرضك .فوق ملاعك
صفر _ واحد مش حكايه

بحبك لما بتمطر سماوينا
هدؤ بيعم كل البيت
خلايق ناموا وأنا قاعد
نجوم الليل محصرانا
رسايل قمرك الطايش
سلامى لكل مافيكي
عنيكى وشكلك الرنان
أنا جايلك بناديكى
وأثورك طريق جفّا
ومن دقّه إلى دقّه
نساfer عكا ونعاود
ونار الغيره نسيانا
وقلبى لسه مدقّى

«منرفا»

أنا أسمر كما لونك
عودك . كما عودى
عودى على سدى
هدّى .. عدّى الطريق مرصوف
قدّى كما قدك
ضلك كما ضلّى

«منرفا» : إلهة العقل والحكمة

ورب البيت أنا راجع
برغم الحيره جواكى
ورغم البعد قساكى
ورغم غيوم سمواكى
قليبى والله مانساكى
هصلّى الفجر وأنزلّك .واحملك
كتافى درب سردابك .ما أنا ضلّك
وأنا جيشك وأنا طيشك
فأمشيرك
هواكى يوزن المجنون فيتعقل
وتاره يسطل العاقل فيتجنن
ويتفنن .ويكتبك مواويلك
ياسابقه فى الهوى جيلك
أنا جيلك
وأقدمك تحياتى
يا سرّ الدوشه فى سكاتى
يالمانى وحميانى من الغربه

ياصينانى
لانا هتلر عشق إيفا
ولا عنتر عشق عبلة
ولا بيرم، ولا قدرى ولا حداد
أنا أحمد وشيبة قلبى من يومى
شيّب قلبك العباد

قصيده فيروزيه

فيروز غنّى ف غصون الشجر
رقصّى فروع الهزيله
غنّى ف بيوت القسايد
فرّحى بيوتها الحزينه
بحبّك اه بصوت الناي
وصوت الضحكه لما تهلّ
أبات فرحان
يبات فيا الكلام
طيب
ومش قلقان

وصوتك فيا لما بنام
بدندن بيه
مسينا كنّا بنغنّيه
صبحنا بقينا عاشقينه
وشط الحب راسمينه
وفرشينك ياسامينه
وكام ضحكه ف ألحانك
بتدى النور لعاشقينه
أمانه تصلّى وتعاودى

تطفئ الجرح بعنيكي
واخبي الخوف ف جفنيكي
وانام لحظه على ايديكي

ونتسابق على الفرحة
واجبك شال على كتافك
والفلك كمان طرحه
ينام الشعر حوليكي
يقولك كام قصيدة حب
يا إمانقوب ياما نطب
ما فيش أوقات تفرقنا
ولا الأحزان هتبعدنا
نقرب لحظة الفرقه
ونشمت ف اللي بعدنا

بحبك حب جدنا, وجملنا, وجنا
صهيل ف القلب شقنا
من الأوجاع
وانا بياع
أغانى يابا دوابه
بحبك موجه قلابه

تغرّق قلبي بالإحلام
وأنا قدّام
عيونك زهر تشريني
وتفّاحي
يلون لونك الجافى
تحنى عليا وتخافى
تدادى بكل حنيه
وأوجّه نحوك النيه

وأنا ناوى أفلّك بلاد الله
وأرقصلك على الكورنيش
وأطلعك من البراوير
كما صورته فقلبك رافضه تتغير
وأنا صغير
على وجعك أنا صغير
ولاحمك
ييات فيا الغرام صاحى
ف صوت الفجر
يحملك
ويتبسّم
وأتعري من الأوجاع
وأنا من حزنى بتقسّم

أنا ورده رماها الشوق
وعداها بميت قارب
أنا ماشى
وهرد الباب وسايب قلبى متوارب

بحبك لاجل مانجمع عيون العشاقين
يرسو ، ويستنو
مواعيد الغرام بينا
يشوفوا عنينا يتجنوا
ويتغنوا بأغانينا

واديننا بقينا وحدينا
انا والليل

أنا والبحر
بنستنى السعات تخلص
ولما الصبح يجمعنا
بتخدعنا
السعات وإحنا بننساها
ومين فينا اللى رساها

وانا جايك
عنيكي ترسي ف عنيا
تصفيني من الأوجاع
يغيب الحزن جوايا
ويبدأ من جديد فرحي
تغني لي أغاني « نجات »
« عيون القلب »
سهرانه مابتنامشي
واغنيك
وأجدد لحنى جواكي
وأسيبك تبدأى نومك
بلا إزعاج

سلام يام القلب أبيض
بلا شيبه
سلام والروح هناك بينا بلا غيبه
بلا مسافات
سلام والسرّ جوايا
سلام والسرّ جواكي
ما بيني وبينك الجوابات

هنا قلبي

هنا قلبي اللي ماحبش

ولا صدش

ولا صلش

لغير الله

هنا مرسى الحياه والدنيا والأحلام

هنا شُفَتِكَ / وسجَلَتِكَ

وسميتِكَ / وعَلَيْتِكَ / وخَبَيْتِكَ

ورسيتِكَ ورقصتِكَ

على الأنغام

هنا ياسلام

مانيش باعتك عشان

كُتِر الكلام خلص

ده أنا جوه القصيده إمام

أنا من غير تاريخ ببدأ

ولو كان التاريخ مبدأ

أنا الايام

أنا الايام

بشاغلها ..وتشغلنى

وبسألها ..وتسألنى

عن الكلمه اللّٰي مِش بتشيب
عن النسمة اللّٰي مِش بتسيب
عن البنت اللّٰي حبتنى وحبتنى
وحبتنى ومش بتغيب
عن البنت اللّٰي حبيتها
بقالى كثير قصاص بيتها
معدّشنى
ولاشفتش ملامح وشها القمره
عنيها السمر وعتابها
طريقة لبسها حجابها
وصوتها جوه كل صلاه
بحس كائن بلمحها ف روح الطير
غنى العصافير , أذان الفجر
والديك اللّٰي بيسبّح بإسم الله

وببدأ وحدى ف الرحلة
بلاقى صديقى
يندهلى
أنا شكلك
أنا وإنت
كما يونس فى بطن الحوت
نناجى ربنا ف الموت
نلاقى حقيقة الإحياء

ویرجع وافتکر تانی
ویرسأل قلبك الرحمة
لیه خطویکی مابتکملش للأخر
قصیده کلها فی النور
شجاع الحرف
مش بیداری تفعیلته
شجاع الشعر والشاعر

ع القَدِّ

بحبك كيف غيطان الزرع لما تشبَّ يوم الحصد
واحبك قد طول سهري وانا مسافر فليل البعد
واحبك وانتى فرحانه
ووشك فرحه مكبوته يدوب على القد
وقد القد أنا عاشقك
واكد الكد علشانك
ده انا شانك
والوانك فالوانى
يارسمانى
ولد أسمر
طويل القامه
قدَّ القَدِّ

قررت

من وحى هذا التيه ف عيونك

قررت أوصل للمفیش

قررت أصلب دمعك فيًا

واتكى فوق جاذبية ضحكنا

ف عيون الوجع

بين إنصهار الشك ف بيوت اللقى

وبين إنعدام البكا

ف رحاب الفراق

قررت أسكن

بين بواقى غربتك والاشتياق

أحمد محمد عبدالوهاب الجميلي .. شاعر عاميه

- درس تخصص الهندسه المدنيه بجامعة الاكاديميه البحريه.
- حاصل على المركز الاول فى جائزة الابداع الكبرى لعامى 2012 و 2013م.
- حاصل على جائزة المركز الاول فى مجال التفاعل الثقافى فى مجال الشعر من الجامعه ف عام 2011م.
- وحاصل على تكريم من الجامعه فى عام 2014م.
- عضو نادى ادب أسوان ، وعضو فى بعض المؤسسات الادبيه فى أنحاء الجمهوريه فى الاسكندريه والقاهره.
- حضر مجموعه من المؤتمرات الادبيه داخل جمهوريه مصر العربيه.
- مؤتمرات أدبيه .وورش كتابه.
- وحضر مؤتمرات خارج الدوله .فى المغرب العربى وحاصل على تكريم من مهرجان أزمور للثقافه والفنون بدوله المغرب.

للتواصل مع الشاعر على موقع الفيس بوك : facebook

<https://www.facebook.com/ahmed.algmaly>

رقم الهاتف : 01141852601

البريد الإلكتروني : ahmed_algmaly@yahoo.com